

01 AUG 1996

Wartawan

PROJEK PERINTIS WARTAWAN MASUK DESA DI SELANGOR SEPT. INI

SHAH ALAM, 1 Ogos (Bernama) -- Selangor bersetuju menjadi negeri perintis projek "Wartawan Masuk Desa" dalam usaha melahirkan generasi muda anak-anak desa berfikiran kritis dan objektif bagi memastikan pencapaian matlamat menjadi negeri maju pada 2005.

Menteri Besar Tan Sri Muhammad Haji Muhammad Taib berkata projek anjuran Persatuan Wartawan Melayu (PWM) itu bukan saja akan mendedahkan generasi muda di kampung-kampung tentang kerjaya wartawan tetapi juga teladan pemikiran kritis yang membina.

"Pemupukan pemikiran kritis dan objektif ini perlu didedahkan kepada masyarakat desa dari peringkat awal agar mereka mudah memahami dasar dan hala tuju negara serta mengambil bahagian dalam pembangunan," katanya pada majlis penghargaan Malam Perdana PWM di kediaman rasmi beliau di sini, hari ini.

Presiden PWM Encik Yazid Othman berkata projek perintis itu akan dilancarkan di Teluk Panglima Garang bulan depan dengan mendapat sokongan penuh Anggota Parlimen Kuala Langat Dr Shafie Mohd Salleh yang telahpun menyediakan bangunan dan komputer bagi tujuan itu.

Beliau berkata PWM dengan 1,500 anggota akan memperkenalkan kerjaya wartawan kepada anak-anak muda di kampung-kampung melalui ceramah, latihan serta bimbingan menerbitkan makalah tempatan dan penggunaan komputer termasuk menyediakan homepage dalam Internet.

Katanya, PWM akan memperluaskan program itu ke seluruh negara dengan mendapatkan kerjasama wakil-wakil rakyat.

Antara program lain PWM untuk tahun ini, katanya, mewujudkan Persekutuan Wartawan Muslim Sedunia bagi menjalinkan rangkaian strategik wartawan Islam untuk mengimbangi berita-berita mengenai Islam dan negara-negara Islam pada pandangan antarabangsa.

Pada majlis itu Muhammad, selaku penasihat PWM, menyampaikan sijil-sijil penghargaan PWM kepada semua media massa di atas sumbangan dan kerjasama mereka menjayakan Malam Perdana PWM yang dihadiri Perdana Menteri Datuk Seri Dr Mahathir Mohamad baru-baru ini.

Presiden Persatuan Wartawan Muslim Filipina, Datu Mesiding Noor Yahaya turut hadir pada majlis itu.

-- BERNAMA

MNY AHH